

“Gwyn eu byd y tangnefeddwyr, oherwydd cânt hwy eu galw’n blant i Dduw”

**(Mathew 5:9)**

Dyma un arall o ‘Wynfydau’ yr Arglwydd Iesu. Mae’n sôn am dangnefedd, neu heddwch, pwnc canolog iawn i’r Testament Newydd.

## Shalom!

Dyna’r gair Hebraeg sydd wedi dod yn gyfarwydd i ni erbyn hyn. Yn y Roeg, y gair yw ‘eirënë.’ Mae’n siŵr mai yn Aramaeg, iaith debyg i Hebraeg, y byddai Iesu’n siarad. Yn Hebraeg, nid rhywbeth negyddol yw heddwch, megis absenoldeb trafferth neu ryfel; i’r gwrthwyneb, mae ‘shalom’ yn gadarnhaol, rhywbeth sy’n peri’r daioni uchaf i ddyn. Mae dymuno ‘shalom’ i rywun yn golygu dymuno presenoldeb pethau da, nid yn unig absenoldeb pethau drwg.

## Gwneud heddwch

Rhaid cofio mai tangnefeddwyr, rhai sy’n gwneud tangnefedd, sydd o dan fendith y nef, ac nid y rhai sy’n caru heddwch yn unig, heb wynebu’r gost. Mae caru heddwch a pheidio â wynebu problemau yn medru creu mwy o drafferth a thensiwn yn aml. Nid trwy osgoi materion pwysig y daw heddwch y Beibl, ond trwy eu hwynebu, delio â nhw, a’u concro. Dyma beth yw gwneud tangnefedd a heddwch.

## Sut mae bod yn dangnefeddwyr?

**Rheoli’r tafod.** Dywed epistol Iago: “**Rhaid i bob un fod yn gyflym i wrando, ond yn araf i lefaru, ac yn araf i ddigio**”(1.19). Rhaid ceisio gras yr Arglwydd i beidio ag ymateb i air sydd wedi’n brifo. Rhaid peidio ag ailadrodd cyfrinachau neu bethau annheilwng ac angharedig am rywun arall. Rhaid gweddi’o am ddoethineb i dewi yn aml.

**Cofio cyd-destun Teyrnas Crist.** Rhaid i ni weld popeth mewn cyd-destun ehangach na ni’n hunain. Os oes mater yn fy mhoeni, ac rwy’n cael fy nhemtio i fynnu fy ffordd a’ m hawliau, beth fydd y canlyniad o ran tystiolaeth yr Efengyl? Beth fydd y canlyniad o ran Eglwys Iesu Grist? Mae achos Iesu’n bwysicach na’ m hachos personol i.

**Ceisio heddwch.** Rhaid chwilio am gyfleoedd cadarnhaol i ddangos heddwch a thangnefedd. “**os bydd dy elynion yn newynu, rho fwyd iddynt; os byddant yn sychedu, rho iddynt beth i’w yfed**” (Rhuf.12.20). Mae cyfle i dorri muriau anghydfod trwy garedigrwydd a gosyngeiddrwydd.

**Rhannu tangnefedd.** Rhaid cael gras i beidio ag ymbellhau oddi wrth bobl.

Dylem fod yn hawdd i nesáu atom ac i siarad â ni. Dylai fod trugaredd a gras yn treiddio trwy ein personoliaeth. Mae'n amlwg mai trwy Grist y daw'r gras hwn i'n bywydau a thrwy ddylanwad yr Ysbryd Glân arnom.

## Heddwch mewnol

Mae'r gair Cymraeg 'tangnefedd' yn awrgymu heddwch mewnol. Mae'n debyg mai'r esboniad mwyaf cyffredin o'r Gwynfyd yma yn yr Eglwys Fore oedd ei fod yn cyfeirio at y person sydd yn dod o hyd i heddwch yn ei galon a'i enaid ei hun. Mae tensiwn a thyndra mewnol yn om i gyd, rhwng da a drwg, a rhwng yr hen natur a'r natur newydd i'r Cristion. Mae'r person sydd wedi cael tangnefedd yn ei galon, gyda'i holl galon yn eiddo'r Arglwydd, yn hapus mewn gwirionedd.

## Plant i Dduw

Ystyr yr ymadrodd yma yw eu bod yn debyg i Dduw. Gwelwn ymadrodd tebyg yn y disgrifiad o Barnabas – fe'i gelwir yn fab anogaeth. Felly, pan mae Cristion yn dangnefeddwr, mae'n debyg i'w Dad nefol.

Un o'r disgrifiadau o Dduw sy'n digwydd yn aml yn y Testament Newydd yw **'Dduw yr heddwch'**. Yn wir, mae holl neges yr Efengyl yn dangos Duw fel tangnefeddwr, yn cymodi'r byd ag ef ei hun yng Nghrist. Dywed yr Efengyl fod Duw wedi meddwl meddyliau o hedd amdanom: **"bwriadau o heddwch, nid niwed, i roi ichwi ddyfodol gobeithiol"** (Jer. 29:11).

Un o deitlau'r Meseia yw **'Tywysog heddychlon'** (Es. 9:6) ac mae'r apostol Paul yn sôn am waith Duw yng Nghrist, **"wedi iddo wneuthur heddwch trwy waed ei groes ef, trwyddo ef gymodi pob peth ag ef ei hun"** (Col. 1:20 BWM).

Dywed Paul hefyd bod Crist wedi gwneud heddwch rhwng pobloedd oedd yn hollol elyniaethus i'w gilydd, trwy'r groes, sef trwy iddynt ddod yn Gristnogion. Felly daeth Iddew a Chenedlddyn, caeth a rhydd, gwryw a benyw, yn un trwy Grist.

## Gweinidogaeth cymod

Yn dilyn hyn, mae'r gwaith o efengylu yn waith o gymodi ac o wneud heddwch hefyd. Yr ydym ni fel pobl Crist yn lysgenhadon dros Dduw ac yn erfyn ar bobl i gael eu cymodi â Duw trwy ddod at Grist eu Gwarddwr a'u Harglwydd. Mae'r Efengyl, yn gyntaf, yn cymodi dyn â Duw. Mae efengylu hefyd yn bwysig i gymodi pobl â'i gilydd. Yn nawdegau'r ganrif ddiwethaf gwelais Gristnogion o Serbia a Croatia yn cofleidio'i gilydd pan oedd eu cydwladwyr yn bomio'i gilydd.

Diolch am Dduw yr heddychwyr a'r tangnefeddwyr, a diolch am ei Efengyl sy'n gwneud pobl yn debycach iddo.